



04-11-2021

UKA 2021/71

UPA 2022/71

Naqqiut

Naqqiut 20. august 2021-meersoq taarserpaa.

Naqqiummi oqaaseq ataaseq una taarsersorneqarpoq una – siunnersuullu allaqqasuani tamanut atuutissalluni: ***”ingerlatsiviit tamakkiisumik ilaannakumilluunniit akileraarutai 20%-imut”***

Uanggaak:

” Inatsisartunut aalajangiiffigisassatut siunnersuut Naalakkersuisut peqquneqassasut siunnersuuteqaqqullugit isertitanut akileraarutip inatsisartut inatsisaata allanngortinneqarnissaanik, ingerlatsiviit tamakkiisumik ilaannakumilluunniit akileraarutai 20%-imik appartinneqassammata 1. januar 2023-imiit”

Imatut taarserlugu:

”Inatsisartunut aalajangiiffigisassatut siunnersuut Naalakkersuisut peqquneqassasut siunnersuuteqaqqullugit isertitanut akileraarutip inatsisartut inatsisaata allanngortinneqarnissaanik, ingerlatsiviit tamakkiisumik ilaannakumilluunniit akileraarutai 20%-imut appartinneqassammata 1. januar 2023-imiit”

20. august 2021

UKA 2021/71

Inatsisartut ingerlatsinermut maleruagassaasa § 33 tunngavigalugu Naalakkersuisunut ukuningga aalajangiiffigisassatut siunnersuuteqarpunga:

Inatsisartunut aalajangiiffigisassatut siunnersuut Naalakkersuisut peqquneqassasut siunnersuuteqaqqullugit isertitanut akileraarutip inatsisartut inatsisaata allanngortinneqarnissaanik, ingerlatsiviit tamakkiisumik ilaannakumilluunniit akileraarutai 20%-imut appartinneqassammata 1. januar 2023-imiit.

(Inatsisartunut ilaasortaq Jens-Frederik Nielsen, Demokraatit)

Tunngavilersuut

Demokraatit nunatsinni siuariartornissaq ineriartornissarlu kissaatigaat, isumaqarpugullu, ineriartorneq taanna namminersortunit ingerlatsisunit pissasoq. Taamaattumillu nukittuunik suliffeqarfinnik pilersitsisariaqarpugut, aningaasaliinissaminut periarfissarissaarnerusunik taamaasillutillu naammassisaqarnerulerlutik, siuariartortitsillutillu suliffinnik amerlanernik pilersitsissammata.

Iliuserisassat pitsaanerpaartarissavaat suliffeqarfiit aningaasaatimik amerlanersaasa tigummiinnarnissaat. Ingerlatseqatigiiffinnut akileraarut allatut oqaatigalugu 20 procentimut apparneqartariaqarpoq. Taassuma kingunerissavaa, suliffeqarfiutivut nunaqavissut nunani allani suliffeqarfinnut



unammillersinnaanerulernissaat, tassungalu ilutigalugu, suliffeqarfiit aningaasaliinissaminnut akissaqarnerulissallutik, suliffinnik amerlanerusunik pilersitsillutik taamatullu aamma akileraarutitigut isertitat qaffallutik. Taakku saniatigut inuiaqatigiit isumaginninnermut aningaasartuutitut sipaassapput, iluanaarutitullu aamma inuiaqatigiinni assigiinngissuseq minnerulissalluni amerlanerit sulilernerisigut.

Malugeqqunarportaaq, naammassisaqarneruneq ingerlatsiviit akileraarutaasa appartinneratigut ima kinguneqassammat akissarsiallit tiimimut akissarsiaasa qaffanneratigut iluaqutaassalluni. Ilaqutariinni ataasiakkaani inuiaqatigiinnilu atugarissaarnerup qaffanneranik kinguneqassalluni.¹

Demokraatit aallaavittut isumaqarput, pingaartuusoq, siunnersuuteqartutut siunnersuutit aningaasalersorneqarnissaannik siunnersuuteqarnissaq. Erseqqissarneqassaarlu, taamatuttaaq allatut aningaasalersornissaannut siunnersuutitut ammagatta. Siunnersuutit aningaasalersornissaannut siunneruutigaarput aningaasanut inatsimmi ingerlatsinnermut- ilassutitullu tapiissutitut sipaarniarnikkut aningaasalersorneqassasoq. Taamaaliorneq ukiumut 56 millioner koruuninik aningaasartuutikinnerunermik kinguneqassaaq.² Aningaasalersornissaannut siunnersuutit uuma aningaasalersornissaannut siunnersuut tamakkiisumik siunnersuutit ilaattut isigineqassaaq aammalu uani katersuunnermi akileraarutitut- aamma akitsuutitut appaanissanik Demokraatit siunnersuutaasa ilaattut.

Taakku saniatigut Demokraatit isumaqarput siunnersuutit annertunersaa imminut matussusissasoq. Ingerlatsiviit akileraarutaasa appartinnerata kingunerissavaa, suliffeqarfiit ataasiakkaat aningaasaatiminnik amerlanerit tigumminnissinnaanissaat. Aningaasat, suliffeqarfiit ataasiakkaat ineriartortitsinissaminnut qulakkeerinnissutissaat. Taassuma sulisunik amerlanerit pisariaqartitsilernerup kingunerissavaa, taamaalillunilu aamma, inuiaqatigiinni suliffissaaleqinerup apparnera.

Tamanna takuneqarsinnaavoq § 37 apeqqummut normu 038-2021-mi akissummi, inuk ataaseq imminut pilersunnginnermit sulileruni pisortanut 130.000 aamma 180.000 koruunit akornanni sipaarutaasinnaasoq. Imatut paasillugu, inut 400 missaat ingerlatsiviit akileraarutaasa appartinneqarnerata kinguneranik suliffeqalerpata, siunnersuut tunngaviumik imminut matussusissaaq.³ Tassungali atatillugu eqqaaneqassaaq, qulakkeerneqarsinnaanngimmat, maannakkut suliffissaaleqisuusut ingerlatsiviit akileraarutaasa appartinneqarnerannik suliffissat taakkunannga tiguneqarsinnaassasut. Taamaattumik sulisussaaleqilersinnaavugut. Unammilligassaaq taanna siunissamut qaninnermuinnaq tunngasinnaavoq, maani nunami ilinniagaqassutsip qaffakkiartornera pissutigalugu, taamaalilluni siunissami ungasinnerusumi kingunerissammagu, suliffinnut nutaanut taakkununnga ilinniarluarsimasunik naammattunik sulisoqalernissaa.

Taakku saniatigut pingaartuuvoq tikkuassallugu, Kalaallit Nunaat inoqassutsigimut angingitsoq nunanut allanut sanilliullugu ingerlatsiviit akileraarutaasa appartinneratigut kingunissaa annertunerussammat. Tassunga ilaatigut pissutaavoq, akileraarutit appartinnera aningaasanik isertitaqarnerulernermik nunanut angisuunut naleqqiullugu minnerusarmat.⁴

Neriuppunga, siunnersuummut uunga tunngavilersuutima ersarinnerulersikkaa, ingerlatsiviit akileraarutaat aningaasarsiornerup annertusarneranut ajoqutaasoq. Soorlu siusinnerusukkut allattunga ilaatigut

¹ Økonomisk Analyse nr. 38, Udgivet af Økonomi- og Indenrigsministeriet i januar 2019

² https://ina.gl/documents/para3637/2021/svar/038_2021_skatter Afgifter JFNI akissut.pdf

³ https://ina.gl/documents/para3637/2021/svar/038_2021_skatter Afgifter JFNI akissut.pdf

⁴ Økonomisk Analyse nr. 38, Udgivet af Økonomi- og Indenrigsministeriet i januar 2019



pissutaavoq, ingerlatsiviit akileraarutaat aningaasaliissutitut aammalu sulisut naammasisaqarsinnaanerannut ajoqutaammat. Taamaattumik nalilerneqarpoq ingerlatsiviit akileraarutaannik appaaneq nammineerluni matussuserneqarnissaanut annertuumik attuumassuteqartoq.⁵

Demokraatit siunnersuummut Naalackersuisut maanilu Inatsisartuni partiit amerlanerussuteqartut tapersiinissaat neriutigaat.

Pisortanut aningaasatigut allaffissornikkullu kingunissai

Tulliuttut takutippaat § 37 apeqqummut normu 038-2021-imut akissutigineqartut:

“Suliffeqarfiit akileraarutaannik 20 %-imut appaaneq, tamakkiisumik atuutilersinneqarpat, pisortat isertitaasa ukiumut 60 mio. kr.-nik toqqaannartumik ikilinerannik kinguneqassaaq. Pisortanut allaffissomikkut kinguneqassanngilaq. Suliffeqarfiit akileraarutaannik taamatut appaanerup saniatigut sunniutissaanik naatsorsuivinnissamut tunngaviusinnaasunik kisitsisinik pigisaqartoqanngilaq. Taamatut saniatigut sunniutissaasa pisortat isertitaasa qulaani taaneqartutut ikilisissavaat..”⁶

Erseqqissaatigissavara, Namminersorlutik Oqartussaata aamma kommunit, siunnersuutip kingunerisaanik isertitaat appariassammata.

Namminersorlutik inuussutissarsiutilinnut aningaasatigut allaffissornikkullu kingunissai

Suliffeqarfiit, ingerlatsiviit akileraarutaannik akiliisartut, namminneq aningaasaatiminnik annertunerusumik tiggummiarsinnaalissapput, taamaalinerminnilu aningaasaliinissaminnut ineriartortitsinermullu periarfissaqarnerulerlutik. Soorlu assersuutigalugu suliffeqarfiit qinersinnaavaat sulisuminnut nuannaarutaasumik aningaasarsiaannik qaffaanissaq.

Innuttaasunut aningaasatigut allaffissornikkullu kingunissai

Økonomi- og Indenrigsministeriaqarfiup 2019-mi misissueqqissaarnermini nalilerpaa⁷, ingerlatsiviit akileraarutaasa appartinneqarneranit kinguneqartumit sulisartut akissarsiaat qaffassasut, ullumikkumut sanilliullugu aningaasaateqarnerulerlutik.

Tamanna siunnersuutinnut tunngavilersuutinni sukumiinerusumik nassuiarpara.

⁵ Økonomisk Analyse nr. 38, Udgivet af Økonomi- og Indenrigsministeriet i januar 2019

⁶ https://ina.gl/documents/para3637/2021/svar/038_2021_skatter_afgifter_JFNI_akissut.pdf

⁷ Økonomisk Analyse nr. 38, Udgivet af Økonomi- og Indenrigsministeriet i januar 2019